



明文海卷四百三十五

餘姚 黃宗羲 編輯

墓文

文苑

翰林院修撰舒先生墓誌銘 陳沂

正德丁丑春策天下士以先生為第一甲第一人賜進士及第授翰林院修撰沂與名榜內改庶吉士同先生讀書于中秘戊寅春諸權倖欲武皇南巡江彬寔迫之廷臣數諫不納沂與同館者八人亦具疏未上詔下謂沮逆致疾

弗瘳未堪視朝沂曰未可也先生不從遂入諫復罪刺閣中於是編修崔桐庶吉士王應軫曹嘉王廷陳馬汝驥江暉並令于午門外跪日辰初出盡酉而退者五日人杖三十于廷公每呼高廟之靈神色獨不喪出謫為福建市舶副提舉病危而復蘇遠近有相傳為野祭者先生之事與羅公倫寔相似故人益重焉辛巳今上即位肆赦諸竄謫皆超起先生適奔父喪嘉靖癸未秋服闋復修撰甲申夏會議大理沂與先生疏凡三上以伏闕皆得罪先生再杖于廷幾死明年乙酉太安人棄養

于官邸即扶柩歸塋丁亥春三月十有四日先生以疾卒嗚呼痛哉是年冬十有一月沂待罪補江西左叅議明年戊子秋九月二十有五日其子泰遷先生之柩于進賢之梓溪至章江是日巡撫都御史周公廣巡按御史儲公良材左布政司使顧公珀右布政使黃公芳右叅議李公緋按察使胡公璉僉事王公瑋及郡縣皆往祭于江沂得臨而哭之越冬十月五日塋先生于新建之象山之陽銘于墓者沂何能辭先生諱菽字國棠舒姓世出浙之東陽宋建炎中曰選者來居信之懷玉山

紹興中曰繼祖者遷隆興之北山元大德初曰文英者
從進賢之梓溪至曾祖溥震生祖庭式庭式生法先生
之考也贈如先生官母聶封太安人先生為縣學生時
嘗賦赤鴈郡守以魁天下奇之初號石灘邑有石人灘
諺傳灘合當有魁天下者乃改號梓溪後果及第豈偶
然哉先生生于成化甲辰三月十有二日享年四十有
四先生負氣剛毅所遇貴者常失勇者常喪雖覺峭厲
世不可得而無焉為文章氣逸宕不窮所著述賦詠若干
卷皆觸事而發辭義凜冽定似其行娶齊氏同邑善族

封安人子男三人奉奉奏女二人長適徐曰敬次適樊
夔奉奏側室冉出銘曰維學作人百年其興維名登後
四國是憑學敦其倫道將焉明名隳其節義孰與行去
道去義不可為國噫維先生以辨世惑

朱性甫先生墓誌銘 文徵明

吾蘇有博雅之士曰朱性甫存理朱克民凱兩人皆不
仕又不隨俗為廛井小人之事日惟挾冊呻吟以樂好
求昔人理言遺事而識之對客舉似如引繩貫珠纒纒
弗能休素皆高貨悉費以資其好不恤也成化弘治間

其名奕々望于郡城之東人以其所居相接而業又甚似也稱之曰兩朱先生正德壬申克民死明年性甫又死自兩人死吳中故寔往々無所于考而求其遺書亦無所得惜哉初性甫嘗相約為傳不果及是塋而其子以狀來速銘狀固不若余能詳也性甫長洲人宋樂圃先生之後曾大父元英大父明父灝母周氏性甫生穎異少學于里師覺其所業非出于古人遂謝去從杜瓊先生游于時東南名士若吳興張淵若嘉禾周鼎仕而顯者若徐武功有貞祝叅政灝劉叅政昌劉僉憲珏並

折節與交且推之為後來之秀既而諸老凋落吳文定公石田先生繼起而性甫復追逐其間最後則交楊儀制君謙都主客元敬余視性甫文人行也性甫不余少而以為友視諸公為親蓋其自少至老未嘗一日忘學故亦未嘗一日忘取友以自助也居常無他過從唯聞人有奇書輒從以求以必得為志或手自繕錄動盈筐羣經諸史下逮稗官小說山經地志無所不有亦無所不窺而悉資以為詩其詩精工雅潔務新出意得意處追躅古人所著野航集居謙寔叙之尤精楷法手錄

前輩詩文積百餘家他所纂集有經子鈎玄吳郡獻徵錄名物寓言鉄網珊瑚野航漫錄鶴岑隨筆總數百卷既老不厭而精力不加又坐貧無以自資而其書旋亦散去每撫之嘆息其意殊未已也而豈意其遽死耶性甫性簡慢待人無鈎距晚歲嗜酒婆婆益事閒曠或時乘醉忤人亦不以為尤為郡邑大夫所禮前守洛陽史公新會林公先後修郡志並以性甫從事歲時鄉飲必致為上賓時人祭馬牲甫死時為正德癸酉七月二十五日享年七十是歲十一月甲子塋陳公鄉受字圩

先塋娶監察御史張維書女生子女四人男延娶湯氏建娶尹氏女適金耀花汝舟孫七人男曾庚乾女適彭暉王普張源倪宥曾孫女二人銘曰維朱有聞自樂園君德言孔碩為時令人五百斯年耳孫其秩有賢一人性甫維克其克伊何維文之揚維行之稱德懿其章嗟嗟性甫少也則勤經籍圖書窮終其身抉摘雕鏤既揚亦摧豈無利途弗易其樂其髮蒼々其視茫々歸視其家其書滿床樽酒婆婆百年維適彼祭亦崇孰得孰失陳公之鄉有玄者堂既藏既安後永有光

王履吉墓誌銘 文徵明

嗚呼悲哉王君已矣不可作矣君文學藝能卓然名家
而出其緒餘為明經試策宏博奇麗獨得肯綮御史按
試輒褒然舉首一時敢稱甚藉隱為三吳之望三吳之
士知君者咸以高科屬之其真知者謂能肆情詞藝非
真經生而已然皆非君之極致也乃君之志真欲軼古
人而逾之自非通古今周一世不足以充其所受也是
可以一時一郡論哉君資性穎異將以勤誠于書無所
不窺而尤詳于羣經手寫經書皆一再過為文非遷固

不學詩必盛唐見諸論揆咸有法程余年視君二紀而
長君自北角即與余游無時日不見：輒有所著日異
而月不同蓋浩乎未見其止也而豈意其遽疾而死耶
嗚呼惜哉君正德初與其兄履約並以雋造選隸學宮
巍散儼迹翹然競爽既而履約舉應天鄉試尋舉進士
而君每試輒斥以年資貢禮部卒業太學又試又輒斥
蓋自正德庚午至嘉靖辛卯凡八試：輒斥而名日益
起從游者日衆得其指授往：去取高科登顯仕而君
竟不售以死嗚呼豈不有命哉君高朗明潔砥節而履

方一切時勢蔽利之事有所不屑猥俗之言未嘗出口
風儀玉立舉止軒揭然其心每抑下雖敢稱振疊而醞
藉自將對人未始言學蓋不欲以所能尚人故人亦樂
親附之性惡喧囂不樂居廛井少學于蔡羽先生居洞
庭三年既而讀書石湖之上二十年非歲時省侍不數
數入城遇佳山水輒忻然忘去或時偃息于長林豐草
間含醺賦詩倚席而歌邈然有千載之思迹其所為豈
碌碌尋常之士哉是其志之所存必有出于言語文字
之上者曾不得少見於世而僅以文傳而其所傳又

出于文場困躓之餘雅非其志者嗚呼豈不重可惜哉
君孝友天性常能愉悅其親而順之於道於兄履約少
同筆硯食息起居未嘗少離既各授室而聯姻共食視
室處之時恒倍也君卒時履約方官京師及是以都御
史出鎮鄖陽便道過家以塋君某山之原俾某為銘君
諱寵字履仁後更字履吉號雅宜山人父貞以履貴封
中憲大夫太常寺少卿母朱氏繼母顧氏贈封皆恭人
君生弘治甲寅十一月八日卒嘉靖癸巳四月十三日
享年四十娶徐氏子男一人子陽太學生娶唐氏解元

伯虎女孫男一人銘曰維慧而明亦藝而貞胡不潰于成而卒困于衡吁嗟乎其名

翰林蔡先生墓誌文徵明

嘉靖一十五年辛丑正月三日吳郡蔡先生卒吾吳文章之盛自昔為東南稱首成化弘治間吳文定王文恪繼起高科傳掌帝制遂持海內文柄同時楊禮部君謙都太僕元敬祝京兆希哲仕不大顯而文章奕奕顯然在人要亦不可以一時一郡言也先生雖稍後出而所造日深自視甚高常有所評薦雖唐宋名家猶有所擇

其隱然自負之志殆不肯碌碌後人而潦倒場屋曾不得盱衡抗首一儕諸公間而以小官困頓死嗚呼豈不有命哉先生諱羽字九達其先家陳留宋南渡時秘書郎源自大梁徙杭又自杭徙吳居太湖之包山先生其十四世孫也高祖敬曾祖曾貞祖昇以長子貴封奉政大夫父滂母吳氏先生高朗踈俊懿警絕人少失父吳夫人親授之書輒能領解年十三操筆為文已有奇氣稍長盡法家所藏書自諸經子史而下悉讀而通之然不事記誦不習訓故而融液通貫能自得師為文必先

秦兩漢為法而自信甚篤發揚蹈厲意必已出見諸論著與雅宏肆潤而不浮詩尤雋永蚤歲微尚織縛既而濺滌靡曼一歸雅馴晚更沉著而時出奇麗見者謂雖長吉不過先生乃大悔恨曰吾苦辛作詩未出魏晉之上乃今為李賀耶吾媿死矣其高自標表不肯屈抑如此然其所作凌歷頓迅誠亦高曼莫及當其得意時不知古人何如也先生故遠于易出其緒餘為程文以應有司而辭義藻發每一篇出人爭傳以為式而先生試輒不售屢挫益銳而卒無所成蓋自弘治壬子至嘉靖

辛卯九十有四試閱四十年而先生則既老矣歲甲午以太學生赴選調天官卿雅知其名曰此吾少日所聞蔡其今猶滯選調耶然限于資地亦不能有所振拔特以程試第二奏補南京翰林院孔目居三年致仕歸卒于家

故資善大夫南京刑部尚書顧公墓誌銘 文徵明

嘉靖二十四年乙巳閏正月八日辛巳南京刑部尚書顧公以疾卒于金陵里第先是公考績還自京師道聞長子嶼卒驚惋得疾抵家疾甚久之竟不起嗚呼惜哉

公諱璘字華玉別號東橋居士世為蘇之吳縣人國朝
洪武中高祖通匠作徵隸工部因占數為上元人曾祖
海不仕祖誠以公貴贈資善大夫南京刑部尚書考紋
號愚逸初封承德郎南京吏部主事加贈資善大夫南
京刑部尚書祖母陸氏母楊氏俱贈夫人公以應天府
學生領弘治乙卯鄉荐明年丙辰進士己未授廣平縣
知縣壬戌徵入為南史京部驗封司主事進稽勳郎
中正德己酉陞河南開封府知府癸酉謫授廣西全州
知州丙子起知浙江臺州府陞浙江布政司左叅議嘉

靖改元冊立中宮禮成奉表入賀道陞山西按察使以
親老辭不允尋以病免戊子起為江南按察使未行陞
浙江右布政使轉左布政使庚寅召為都察院右副都
御史巡撫山西疏乞終養忤旨落都御史以布政使致
仕丁酉再起為都察院右副都御史巡撫湖廣兼贊理
軍務己亥陞刑部右侍郎尋改吏部會顯陵肇工改工
部左侍郎領山陵事進工部尚書事竣還朝改南京刑
部尚書公于是歷仕三朝閱五十年歷十九任積階自
文林郎歷十有一資為資善大夫正位上卿公融朗潤

達精于吏理能激昂任事初蒞廣平年甫弱冠或易視之而公閱決敏利摘伏若神拊循利道靖而不煩而飾以文學有古循良之風及為開封益更練堅決盜起燕薊流劫中原攻圍城邑所在繹騷兵部尚書彭公澤奉詔討捕領兵壓境上簡公自輔公亦悉心展錯練公飭甲轉餉傳餐取具呼喻閒而解難折衝謀畫居多在郡期年隨事經理多所緒正而強執不撓鎮守中官廖堂特逆瑾黨援圍奪自恣公挫折捍蔽每折其萌芽不令得肆瑾誅廖罷去而錢寧用事羣阉方熾王宏者尤諄

謾剽疾繼廖出鎮席權藉寵氣焰讐人一時有司或屈節自容公故不為禮有所徵需一不荅歲時展謁長揖而已用是即積忤宏方特寧為援矯詔逮赴錦衣獄獄吏問狀公據禮執誼抗言條對一無所承寧無已遣邏卒陰探郡中無所得乃文致他事以竟其獄成鑄三階徙全即古零陵郡越在嶺嶠僻荒取陋公不鄙夷其民而翊以文教道化更革誠心拊綏久之民用乂安而士興于學甫三年而有臺州之命臺為東南劇郡武衛錯居俗獷而居詐胥吏並緣其間縱橫饕餮更數

政不治公至爬疏別決求得其弊端與利源所在次第
興除之故事武衛諸城郡為修築更費浩穰率為主守
者乾沒恒歲一築：輒壞公鈎考得所侵漢悉沒入為
城費檄義士經理而程督之故他城易壞而臺所隸三
城特完郡瀕海有鹽筴之利貧民業鹽自食若督推煩
苛每迂道轉輸而邏卒乘是為姦利至相賊殺不可止
公為弛禁俾得負販出郡下而薄其稅入民用便利而
國課亦登故時軍餉不時給運軍往：稱貸以需而駟
儈得肆侵牟公支放有期而勾稽維審軍皆給足而奸

民無所牟利矣郡南瀕江卑下多水患地有中津橋且
壞公復修之因築石隄而樓其上凡數十楹人初莫喻
其旨已而夏潦水猝至居民得依樓以避所活以千計
乃服公先見云既久于臺悉浙中事宜繼起藩叅遂得
舉而行之雖不及久而宏規石畫功緒為多及以左轄
重臨益諳練宏達措意復周審展采錯事惟志所為而
釐革積弊若賦發科適調補吏胥皆利蠹蟠結前政所
不敢問者公排根絕蔓搜剔不少縱而畫一以守要束
章程咸正而掾吏不得緣以為姦事緒襟襲文牒糾紛

隨事剝裁司無留政御史按浙者往歛手無所事
然積不能平秉其解任而躡尋過誤一時雖橫被口語
而素履明潔堅實在人卒亦不能有所誣蔑也起撫湘
南益事振植湖湘遐曠提封數千里無臣尊重受計坐
理而已公不躡故迹軺車^省首循徧歷州郡雖偏疆下鄙
莫不躬泣跋涉險阻蒙犯霜露不少厭却故事撫呂巡
歷必以藩臬守臣自隨公悉謝遣輕車簡易備從歛約
供頓次舍身足周用民安堵不知為勞念荆湖法行而
庸沅惰弛地利有所未盡科輸煩擾期會促迫民日益

貧公私交病故所至勸農振業平徭復稅而適伏省
微軌跡夷易民用安集而歲亦比登在鎮逾年多所建
白首言地瘠民貧兵食不足而藩府賦祿無限後繼為
難又以湖湘控扼邊徼地大事繁御史按部歲更一代
勢不能周欲乞添差御史分蒞湖^南北以廣詢謀又言外
屬臣僚多有宏才碩望足克任使者比歲限以藩府戚
屬不得內徙此非祖宗舊制乞越例推選以收偉才所
言凡數十事皆當時利病深切治理雖不盡施行而論
者莫不題其言云顯陵之作役大事繁經費不貲公既

長于料簡而程省弗懈調發有制視他所營率損費十五而功寔倍規制宏偉翬飛赫奕而民不告病有司不以為煩其經理施置有足多者然此特出其緒餘耳而非公所用以為才也及是雖典邦刑而留世務簡亦不足以盡其用在鄰里在父老姻戚不能無望于公而公執志堅定不肯翫敲以徇苟罹于辜必以法繩之豪植強禦咸不得肆而怨言興矣言者固得假以為辭肆言醜詆而素所忌嫉之人從而醞釀之公雖內省不媿而不勝浸淫之辱竟鬱鬱以沒嗚呼公論不明是非失賢

使瑰竒卓越之才不復推究于明盛之世必有執其咎者君子有固俟于百世之下也然公亦奚憾哉公素長者不虞人詆欺而直諫自信不肯脂韋干譽出入中外垂五十年一時新進多非曹偶公既前輩自處論議之間陵轆奮迅侃侃自將每下視諸人多不能堪往夕旁晚切齒而公不知也其得謗受禍殆亦以此乎平居事親孝愚逸公病疽公時已五十餘與同卧起吮濯扶掖舉身親之肉血淋漓十指皆潰曾不肯自逸以委勞于人初公以親故一再解加官其後出入靡恒而二親之

亡公適皆在告皆得受終焉殆有不偶然者舉羣從兄弟尤極友愛從弟英玉繼公起進士官按察副使仕歸而貧而介潔自將公雅知其志雖日與親接而不輒餽遺然而中心相孚不殊同胞也少學于李璞先生李死一子不立妻某不免饑寒公在官每分餘貲給之既又為其子植產菴植菴廢而其子卒困以死乃迎某氏于家死為殮墓而給其孫如子終其身不衰友人胡欽死妻方食貧養姑公俾里中上其事請表于朝凡旌核探究文牒往來咸具于公而一切更費咸自公出至于里

黨族屬婚喪緩急亦多倚成于公其于倫誼至篤也為文不事險刻而鑄詞發藻必古人為師見諸論著雄深爾雅足自名家詩又雋永矩矱唐人而劍艾陳爛時出奇峭樂府歌詞不失漢魏風格問學深博既有資地而才敏氣充足以發之自其少時已有名世之志既舉進士即自免歸大肆力于學時陳侍講魯南王太僕欽佩皆未仕家居皆名能文與相麗澤敢望奕然時稱金陵三俊及官南曹事甚簡益淬厲精進居六年而譽益有聞自是出入中外所雅游若李壘尚獻吉若何太復

仲默若朱昇之徐昌穀皆海內名流一時詩名震疊不
啻李杜復出而公頽頽其間不知其孰為高下也然諸
公皆仕不顯又皆盛年物故公仕最久官亦最顯所歷
若沈湘若天臺元鴈宕若衡嶽皆山水勝處雖簿書鞅掌
而不忘觚翰所至領客讌遊感時懷古臨觀賦詩風流
文雅照映林壑委蛇張弛有古高賢特達之風及是特
解留務往來吳門尋鄉里舊游期余盡游諸山以畢其
平生而事左心違竟成乖越嗚呼而今已矣尚忍言哉
公所著書曰國寶新編曰近言曰頽氏七記詩曰浮湘

稿曰山中集曰息園集曰憑几集曰登衡小記總若干
卷距生成化丙寅七月二日享年七十娶沈氏封夫人
子男三人嶼歲貢生娶羅氏時娶陳氏又次峻女子二
人適俞璉趙念孫男八人履祥廕為國子生次賓祥元
祥者祥應祥楚祥餘幼孫女二人曾孫男三人履祥等
以卒之明年某月日墓上元彭城山之原前事奉公門
生太常少卿許穀所為狀來乞銘：曰於穆孝皇立國
用明孰言翊之允維邦楨烈烈：頽公維邦之彥爰外而
中式跡用踐起家民牧弗奪弗違言飲之既去而思豈

德則周亦堅厥志：植靡移乃言有濟扶微興壞樹之
風鼓戴蹶載奮卒階以升維靖而共乃剛弗折式迨其
歸峻躋華列出將使換入典邦刑以翼以貞以莫不經
維爰飾用文富茲述乃古有訓仕優而學其學如何賈
言華國敷彰帝猷歌詠明德在孝皇日羣猷英：發藻
攄詞式章用明朝翔後先公寔曹耦德音洋：經學之
懋烈：碩公既瓌既竒學為文宗政為吏部維學維政
鮮茲兼得賢名之高斯毀之積烈：碩公連蹇在是豈
不顯融迄屯厥施彭城之原公兆于斯尚後有考視此

刻詞

浙江按察使僉事皇甫君墓誌銘文徵明

僉事皇甫君子安既解浙臬還長洲未及赴調而母夫
人卒摧毀得疾甫三月亦卒嗚呼傷哉君舉壬辰進士
官禮部以文學為當道所知會東宮肇建遂用為春坊
司直論者以為得人而餘人意忌固已媒孽其間未幾
補外自是浮沉外僚者累年再起再債卒翫體以沒嗚
呼自古文學之士往：不得志于時其後最擅名固造
物者所忌然而一時秉銓之人不得不受其咎也君諱

淳字子安喬山宋戴公以字為氏世望安定趙宋時有
為提刑者扈高宗南渡居其城孔聖里占數為長洲人
六世祖弒死張士誠之難一再傳乃君之曾大夫也大
父信以文學起家為太學生未仕而卒父諱錄丙辰進
士仕終順慶知府母夫人黃氏生君兄弟四人君其仲
也黃夫人夢人授巨鼎而生韶秀異常能言即解誦書
專對敏給如成人稍長積學綴文遂有名世之志及遂
入郡學為諸生益事博綜兄弟自相師友楊摧探究務
求抵極摠詞發藻迥出流輩未數年相繼舉于鄉而君

與二弟遂收科甲一時名文學之盛三吳之士鮮其侶
者而君不以自異益思振植操廉服勤惻然自守不與
時流徵逐人亦莫敢與狎初授工部虞衡司主事尋改
禮部精膳司再改儀制進員外郎陞主客司郎中主客
職諸蕃朝貢凡餼館勝徠與凡貢篚之屬往來之儀皆
主客領之故時曹司怠緩稽留使人經歲傳食供億浩
穰君奏報以時不踰旬決靡密上下斟酌度維宜視曩時
損費什伍朶顏內屬歲有嘗賫發自內帑故多穢濫君
以其擇邊有功非他濫恩比言于主者俾精擇以給被

賜者莫不懽感以去車駕南巡諸蕃留京師者慮有窺
伺志屏之微外時稱其遠識君自虞衡至主客凡歷四
署所在職辨而能緣飾以文在儀制時建儲九疏咸君
屬草詞理明辨有以上當君心遂為諸公大臣所簡注
春坊之擢蓋緣于此車駕之行君先已註籍扈從會改
官不果行駕次承天按籍推賞而君不在有司秉簡劾
君失事而寔非也坐是左遷廣平府通判踰年召為南
京刑部主事進員外郎尋陞浙江按察使僉事分蒞浙
東所蒞天臺寧紹諸郡民悅而狡饕訖喜訐最為繁劇

君所至懲飭綜核周審擿伏若神而裁決敏利案無留
牘恤隱崇賢納之仁軌甫三月而宿蠹為清管內振肅
以其暇逸覽觀山川發為篇詠委蛇張弛文治燦然譽
聞亦達而南遷考覈惟視一時寔履以為黜陟近時乃
有既徙官而徵其舊事者因得以其私意中傷之然非
顯惡大懲亦不敢公肆詆毀公初曹未及上再任亦無
幾時竟以勝任推擢曾未數月而以不職論黜嗚呼羣
耳目何可塗也君沉靜寡與自負高峻人苟不當其意
終日相對點無一語居官任事砥礪操切不肯脂膏取

客既多忤物又稍二與時匡異故愛之者雖深而卒不能勝夫疾之者之衆也雅性閒靜慕玄晏先生所為自號少玄子作續高士傳以著志居常問學之外他無所事羣經子史莫不貫綜而酷喜左氏著春秋書法紀原通唐文粹為文粹為文必古人為師自西漢而下咸有所擇見諸論撰居然合作詩尤沉蔚偉麗早歲規倣初唐旋入魏晉蓋玄造鑄詞命意直欲窺曹劉之奧而及之惜乎未見其止也沒後其兄子俊集所作為皇甫少玄集云君生弘治丁巳六月一日卒嘉靖丙午三月九

日享年五十配劉氏後君一月卒子男二人長泰郡學生娶王氏次拒聘金氏女三人長適國子生王大猷次適太倉州學生陸鳴陽又次適郡學生吳尚儉孫女二人卒之歲十二月十又三日塋虎丘新阡于是子俊手具事狀率其二子詣余乞銘余何足以銘君哉辭不獲為序次如此係之銘曰嗟皇甫君維時才彥天寔生之亦既有行爰賓于王式揚用昭胡豐其受而厄其遭秩秩郎曹五禮云職身德允文乃言有克維文之克維德德之載寔德升聞有簡斯在青宮蘭省命官孰宜譽者

在前毀者隨之誰毀誰譽君則有命：也自人弗預厥
聞嗟皇甫君靖共維秉豈無遺榮降年弗永弗永其世
式宣其言後有子雲尚鑒我玄

錢孔周墓誌銘 文徵明

吾友錢君孔周以高明卓絕之才負較轆奮迅之氣感
憤激昂以豪俊自命雅性濶達不在檢押所與遊皆一
時高朗元爽之士而唐君伯虎徐君昌國其最善者視
余拘檢齷齪若所不屑而意獨親時余三人與君皆在
庠序故會晤為數時不日見輒奔走相覓見輒文酒讌

笑評騰古今或書所為文相討質以為樂既而唐徐起
高科入仕尋皆病亡而湯君子重王君履約履吉雖稍後
出而游好為密君喜學而好結納自少至老未嘗一日
忘學亦未嘗一日忘取友以自益也其所友必皆勝已
者苟不當其意雖富貴有勢力者輒白眼視之或取怪
怒不恤也家本溫厚室廬靚深嘉木秀野足以游適肆
陳圖籍時：招集奇勝滿座中酒壺列前棋局旁臨握
槩呼盧憑陵翔擲含醺賦詩負軒而歌邈然高寄不知
古人何如也嗚呼而今已矣交游中有如斯人不可復

得矣性喜蓄書每併金懸購故所積甚富諸經子史之外山經地志稗官小說無所不有而亦無所不窺尤喜左氏及司馬班楊之書讀之殆遍遇有所得隨手劄記積數巨帙至所不喜雖世指以為切要而君未始一注目也為文奇崛深奧讀之棘口不能句然思立語麗足自成家而尺牘之妙尤其所長一行數字矢口信筆文意燦然如出硃鍊他人沉思極意不能志也早歲思以功名自奮稍斂鋒鏑以就文場矩矱亦惟涉獵訓故涵泳道腴而已于世所謂帖括關鍵皆不之省人或非笑

之而提學莆田陳公獨識之常按試第君高等咸以為疑公曰吾見其文有古意知非經生常士也余親聞陳公語喜公能得君而又喜君之為陳公所得也自陳公去他主司惟取淺近合格者而君不復振矣君自弘治辛酉至正德丙子凡六試應天試輒不售而年日益老遂自免歸嗚呼惜哉君長身玉立被服鮮華而舉止軒揭人望而異之謂必有所就而奇窮翫麟迄于不偶嗚呼惜哉晚歲困于征徭家日益落而又得末疾行履疲曳每負杖而嬉而高懷雅致不殊前時文酒通從譙談

謔浪逶迤容與使人意消嗚呼君真雄俊不羈之士哉
君諱同愛字孔周別號野亭錢氏其先江都人有諱仲
陽者以醫顯于宋事見國史五世祖益仕元為常州府
醫學教諭避亂來吳遂占數為長洲人益生太醫院醫
士原善原善生晉府良醫宗道宗道生太醫院醫士良
玉良玉生伯寬伯寬生汝式自汝式以上世以醫顯汝
式娶陳氏生君之兄弟二長同仁太醫院御醫次即君
娶張氏子男二人鶴徵太醫院醫士娶吳氏竹徵薊州
吏目出後同仁娶宋氏繼娶湯氏女二人適余長子縣

學生彭次適陳遇側室生子男二人復貞娶某氏女一
人適劉某孫男三人女二人君生成化乙未某月日卒
嘉靖乙酉某月日享年七十有五庚戌十二月某日葬
吳縣寶華山銘曰維氣則揚亦藝而章維命不滅而志
弗昌卷而藏而卒困以亡吁其傷

廣西提學僉事袁君墓誌銘 文徵明

吾友袁君永之以高明踔越之才精深宏博之學而輔
以較轆奮迅之氣自其少時已不肯碌碌從人既起高
科登臚仕視天下事無不可為而砥節履方不可附麗

匪人首忤權臣幾蹈不測賴天子仁聖得不擯棄浮湛中外垂二十年再起再廢迄翫體以死嗚呼惜哉其命也夫君諱袞字永之別號胥臺山人世吳人高祖以寧曾祖琮祖敬先考封承德郎刑部主事諱寓母安人葛氏袁氏自高曾而下世以氣義長雄其鄉而未有顯者至君昆弟數人藻發競秀突起閭閻散生勢長隱然為文獻之族君于羣從中最少而奇穎異常五齡知書七歲賦詩有奇語十五試應天再試再不利憤曰吾所志何如願為場屋所困耶並泮厲精進刺經質義務究底

極嘉靖乙酉遂以第一人荐試禮部亦在高等一時聲名傾動京邑入對大廷摘衍揚繹上下數千言出入經史詞旨宏達時權臣方為學士得君卷奇之執欲冠多士在廷諸臣惡其攬權故抑置二甲第一人及啟封見君名乃悔不用其言而權臣則喜于得君他日詣君叙致本末自謂君知己而君不對亦不謝權臣大慙銜之然無以發也未幾入內閣用事而君方為翰林庶吉士因上言諸庶吉士跡弛靡薄不宜在禁近悉罷為庶僚怒猶未已乃起兵部火災之獄將甘心焉時君武進主

事火時當徼巡在法為失警乃掠立文致劾君縱火為奸利必欲殺之鍛鍊數月無所得編成湖之衛會赦免歸權臣死稍起為南京武選主事歷職方員外郎晉擢廣西提學僉事致仕歸卒年僅四十有六始君自翰林出為刑部主事即思明法以達于政謹推讞審法比所當必允為尚書胡端毅公所知簡蒞本科本科者凡諸司獄詞及上請章疏皆從審畫君析律詳明剴裁敏利而將以勤誠案無留牘時稱職辦有詔以京朝官考各省鄉試君被命主試河南校閱精審去取攸當時稱得

士尋奉使決獄淮揚還朝改司武選武選有銓選有勲祿有貽黃及諸委瑣故踴劇司而貽黃尤多做事君督併嚴密閔決明審吏不得並緣為奸展采錯事方將有為會獄事起而君去國矣在南部適當考選軍政尚書熊公特委重君：杜請托賢察否勵精從事考核緒正一于至公人服其明莫復異議廣西在嶺檄之外獠蠻雜處文教久弛君不鄙夷其人教詔諄切而率之以身示之矩矱程以科條取士貴淳雅而黜浮誕恒矜其不逮薄懲而廣錄以誘進百粵之士：方安其化而君倦

游矣君樂閒曠而居吳興日與高人逸士探竒逸勝登
涉游衍悠然自適^適及歸築室橫塘之上據湖山之勝縱
浪其間有終身之志雖暫起守官而寤寐林壑未始少
忘篤志問學羣經子史無所不窺為文必先秦兩漢為
法樂府師漢魏賦宗屈賈古律詩出入唐宋見諸論撰
莫不合作所著文集二十卷皇明猷寔二十卷吳中先
賢傳十卷世緯及歲時記及周禮直解總若干卷始君
雅志用世及事與心違時移身遠乃肆意于此以洩其
所蘊耳觀世偉所著皆鑿々乎經世之論其官宗遺傳

與夫詎偽諸篇寔維時敏惜不能少見于事而徒托之
空言可慨也已君濶達高朗議論英發能以辨博勝人
人莫能屈然寔無他腸志同道合即傾倒無間故知君
者莫不賢愛之而不勝嫉之者之衆也君生弘治壬戌
十月二十六日卒嘉靖丁未六月二十三日配馬氏封
安人繼文氏子男一人尊尼癸卯貢士女三人適生員
王子恭殷邦柱徐欽墓以卒之某年某月日墓在某山
銘曰侃々表君維時之碩履道含弘抱直翼德爰起高
科式揚用敢載緝用明奕其邦楨維邦之楨弗為道屈

矧茲匪人胡彼之邱豈無榮途有命在天寧玉之毀匪
瓦斯全陷則有寧守則為正孰其生之天王明聖侃侃
袁君守身用恒弗利彼征身否道亨之如何有言則
立言立名存有永魚助

沈先生行狀文徵明

先生諱周字啟南姓沈氏別號石田人稱石田先生世
居長洲之相城里自孟淵先生以碩儒肇家生二子曰
貞吉曰恒吉才義雅飾並有敬稱恒吉號同齋生三子
先生嫡長也生而娟秀玉立聰朗絕人少學于陳孟賢

先生孟賢故檢討副初先生子也諸陳皆以文學自標
致不輕許可人而先生所作輒出其上孟賢遂遜去年
十五代其父為賦長聽宣南京時地官侍郎崔公雅尚
文學先生為百韻詩上之崔得詩驚異疑非已出面試
鳳凰臺歌先生援筆立就詞采燦發崔乃大加激賞曰
王之安才也即日檄下有司蠲其役先生既長益務學
自羣經而下若諸史子集若老若稗官小說莫不貫
總淹浹其所得悉以資於詩其詩初學唐人雅意白傳
既而師眉山為長句已而又為放翁近律所擬莫不合

作然其緣情隨事因物賦形開門變化從橫百出初不拘：乎一體之長稍輟其餘以游繪事亦皆妙諸追蹤古人所至賓客墻進先生對客揮灑不休所作多自題其上頃刻數百言莫不妙麗可誦下至輿皂賤夫有求輒應長纁短素流布充斥內自京師遠而閩浙川廣莫不知有沈周先生也先是景泰間郡守汪公澥欲以賢良舉之以書數遣先生筮易得遯之九五曰嘉遯貞吉喜曰吾其遯哉卒辭不應然一時監司以下皆接以殊禮尤為太保三原王公所知公按吳必求與語：連日

夜不休一日論諫先生曰對章服諫非鄙野人所知然竊聞之禮上諷諫而下直諫豈非貴沃君心而忌觸諱耶公遽曰當今之時將為直諫乎抑亦諷乎先生曰今主聖臣賢如明公又遭時倚賴諷諫直諫蓋無施不可公徐出一章示之曰此吾所以事君者試閱之先生讀畢曰指示切而不泛演言婉而不激於諷諫直諫兩得其義矣公以為知言同時文學之士為上官所禮者往往陳說時弊先生不然曰彼以南面臨我：北面事之安能盡其情哉君子思不出其位吾盡吾事而已然先

生每聞時政得失輒憂喜形于色人以是知先生非終於忘世者先生去所居里餘為別業曰友竹居耕讀其間佳時勝日必具酒肴合近局從容談笑出所蓄古圖書器物相與換玩品題以為樂晚歲名益盛客至亦益多戶屢常滿先生既老而聰明不衰酬對終日不少厭息風流文物照映一時百來年東南文物之盛蓋莫有過之者先生為人脩謹謙下雖內蘊精明而不少外暴與人處曾無乖忤而中寔介辨不可犯然喜獎掖後進寸才片善苟有以當其意必為延譽于人不藏也尤不

忍人疾苦緩急有求無不應者里黨戚屬咸仰成焉平居事其父同齋無所不至同齋高朗喜客飲酒必醉先生不能飲每為強醉以樂客同齋沒乃絕母張夫人年幾百齡卒時先生八十年矣猶孺慕不已弟召病瘵不內處先生與俱卧起者歲餘及卒撫其孤如子庶弟幽墀未練事為植產使均于己一妹早寡養之終其身其天性孝友如此先生娶于陳生子雲鴻文學稱家嘗為崑山縣陰陽訓術側出子復即學生女三長適崑山縣學生許貞次適徐袞又次適太學生吳州江史永齡孫

男一人履女二人曾孫男一人女二人先生所著詩文
曰石田稿總若干卷他雜著曰石田文抄石田詠史補
志錄客坐新聞續千金方總若干卷正德四年己巳先
生年八十有三八月二日以病卒于正寢于是雲鴻先
卒數年矣復乃相其孫履治喪以七年壬申十二月二
十日塋先生于所居之東某鄉某原屬將求銘當世有
道以信于後俾某有述某辱再世之游耳目受矚知先
生為詳遂不克讓用論次如左謹狀

明文海卷四百三十六

餘姚 黃宗羲 編輯

墓文八

文苑

祝先生墓誌銘 陸燾

先生諱允明字希哲蘓之長洲人也其先出古太祝以
官氏或曰黃帝之後封於祝以國氏云七世祖碧山勝
國時由松江來守郡後卒官一子留于蘇遂為蘇人祖
顓正統己未進士終山西布政司右參政父楸母徐氏

大學士武功公女先生少穎敏五歲作徑尺字讀書一目數行下九歲能詩有奇語既天賦殊特加內外二祖咸當代魁儒目濡耳染不離典訓稍長遂貫綜羣籍裨官襍家幽遐鬼瑣之言皆入記覽發為文章崇深鉅麗橫從開闔茹涵古今云所不有或當坐談笑雜還援毫疾書思若泉湧一時名聲大譟歲壬子舉于鄉故相王文恪公主試事手其卷不置曰必祝某也既而果得先生文恪益其喜曰吾不謬知人自是連試禮部不第當道奇其才會修史將名荐之弗果初仕興寧令地介

嶺海民尚華許惑於襍祥先生示之禮簡進秀異授以經學親為誨解逐一變其俗群盜竄處山谷時出焚牧為設方畧一旦捕得三十餘輩邑臣去警稍遷通判應天府止何乞歸又五年卒春秋六十有七夫人李氏鄉先生太僕少卿應禎之女子男二長續進士入翰林累遷陝西按察副使次側出幼未名女嫁潮州府經歷王穀禎先生簡易高曠不樂拘檢在衆若云能者然默而好深沈之思時獨居著書解衣盤礴游心玄閭賓客來者叩戶呼之若弗聞也性善書書出入魏晉諸家晚益奇

縱或購得之輒藏去為榮喜獎掖後進終身不言人過其為家未嘗聞有餘得俸祿及四方餉遺輒名所善客與嚶飲歌呼費盡乃已或分典持去不遺一錢故其沒也幾云以殮云先生少有意用世既獲落不試一發于文雖散實閱振猶非其志也著所書合詩文集為數百卷藏乎家陸粲曰斯文之用與天地準由漢氏來續言之士臻于斯極者亦僅可數已明興百年士猶膠守章句未覩其恢然者也乃憲考之際始彬彬矣祝先生由諸生起覃精發藻橫逸蹕厲超追古昔盛哉若其湛淳

自得龍變不羈大觀逍遙廓然離俗矣夏侯湛贊東方生云明濟開豁色含弘大拔乎其萃游方之外者殆先生哉先生歿以嘉靖丙戌冬十有二月二十七日又明年戊子冬閏十月十六日墓橫山丹霞塢太原王寵撰其事行粲為之銘曰惟聖有文自天啟之其卒散利孰振起之猗嗟先生發天之明達聖之經播為渾鐘舉世震驚雖時弗逢貪貪以終獨昌其辭以燭羣蒙橫山之原崇四尺者先生之坟後勿壞傷視此銘文

天池山人陸子玄墓志銘

陸粲

天池山人陸子玄者吾弟也名灼更名采世吳人吳之西境有山曰天池蓋道書所稱可以度世者也君意慕之因自謂山人云君生踔厲英發始為校官弟子不屑守章句縱學云所不覩從其婦翁故太僕少卿都公游銳意為士文辭尋以例升太學益務精進視當世顯人名能文章者輒往脊門自通賫以所業皆一見賞愛其名遂隱然以起自江以東學士多延頸願交者而君意獨自許用世謂功業可立取時時于廣坐中奮然抵掌論天下事語多觸時禁客不樂聞稍引去或目笑之

君色自如不為止在太學二十年累舉輒踴遭世玩侮中不能去少望日夜典所善客劇飲歌呼為樂間出游或經月忘返橐中裝無一錢從者以告若弗聞也東登泰山賦游仙三章慨然有輕舉之志南踰閩嶠徘徊武夷諸山語人曰世云知我者吾聞京師天下豪傑輻臻又燕趙多慷慨士吾且往觀焉僅庶幾手行半道病還及家意頗惘惘夜中數起東西行謂余曰日者言吾歲行在酉當厄今吾形神不相攝矣吾殆將死也因屏人屬余後事其言悽愴不忍聞兄弟相對歔歔泣數行下居

亡何竟不起傷哉是歲嘉靖丁酉九月廿二日也年四十一後八年乙巳十二月十三日乃葬其地實天池之麓亦若其冥契云陸於吳為著姓宋季始家陸湖之上吾先君諱應賓母夫人胡氏有君三子最先娶都公女繼取鄒氏子男二長舒枝都出府學生次敬枝側出女一鄒出適太學生陳沛孫男二嘉禾嘉粟君性儻蕩不羈典遊處輸寫心腹去所隱匿每揚摧今古品藻人物机辨鋒出莫能窮者而彊執自信不肯訕折徇俗雖故所親善一弗當意則面斥之或致怨對不恤也于文喜稱

六代詩初規摹盛唐晚宗謝康樂造語往々似之居閒弄筆游戲為近俸樂府若調笑率然之作亦醞藉可喜獨好國朝故實所致延訪勤切率多聞人所未聞者他如幽冥物怪黃冶變化之言靡不采獲著之編錄點者或謾言以中其意君亦傾聽勿疑聞有奇人異書不遠數十里走求之其篤好如此余與君少俱僕侍吾伯兄子徵學議論下土自相師友而好嗜畧同方賴焉以相規切庶有益乎而君棄余死矣銘曰吳有奇士陸氏子玄生不逢時又弗永年嗚呼悲夫

大石山人壽藏銘 瞿文懿

大石山人者姓顧氏諱元慶蘇之長洲人也顧在吳為著姓入國初有諱仲賢者任淮陽倅三傳至山人曾祖以禮以禮生瓊、生嚴、娶吳氏繼劉氏生子七人山人其。仲也始山人祖父性孝友稱為長者有文夫子八人多以高貴雄里中山人父個儆頗于治生然好賓客集方技有俠士風山人兄弟多織晉殖產山人獨以圖書自娛意有所適雖叢說不棄所纂述自養生家以及諸史燦然雜陳以故奇博偉習之士尤多好之久與之

游山人稱說古今亶、不窮間游戲翰墨瀟洒夷曠得作者遺意故山人雖窮居而隱然名重士林縉紳先生多折節與交山人故居埭川後徙通安里有山巋然光焰庭戶山人玩而樂之時與同志嘯咏其間因規大石塢為壽藏表以貞松曰人生行樂耳即有不諱吾將墓焉因自號為大石山人且以生誌屬余云余少習知山人文雅甚都竊恠其與眾異趨疑其有阮嗣宗之放達也迨歲山人執父喪余往弔之山人頽甚毀瘠杖乃僅起心益重之既余登山四望窮甸吳之壘慨然歎曰嗟

乎此泰伯之所以從適也夫古人意有不存即視天下猶敬展况下焉者乎既而徘徊夷猶南望震澤東望胥口傷子^晉之不終至為流涕思欲起^范蠡而挹其緒風乃知山人之意矣遠今山人不以後事為諱而屬余以誌銘蓋將齊生死等彭殤超然與元化共游窮遠之際又惡足為山人言哉山人配王氏誥封詹事府翰林院侍讀學士王公朝用之女子男四人曰誥曰諫曰議曰諛各事耕讀不愧山人云銘曰雲觸石兮山冥龍翕忽兮雨下零忽雲收兮雨止獨山石兮青瑩豈動者不

處兮而靜^者永寧吟山風兮玩山月固將永托乎山靈

南京國子監祭酒槐野王公行狀 瞿文憲

嗚呼槐野王公之卒三年矣淳每念疇昔瞻望西岳輒歔歔不能止思欲一拜几前無從也今年丁巳春公母太孺人將圖塋公乃馳一介走京師乞銘于當世名公且屬某編次行事頌某誠固陋不足以知公然公從弟維^新所述甚核而文參諸吏部司勳南君所親記宜得其大都謹拜述如太孺人教姓王氏諱維禎字允寧別號槐野陝西華州人也其先昌平州人始祖諱伯牙者由

進士任河南憲副左遷華州稅課局大使因家烏伯牙
生處士得三子真定縣令徽處士和生子六人處士
原其行五也原生子二人長曰載號文菴次日軒號質
菴文菴父公配劉氏正以德丁卯十一月二日生公王
氏之家華州者至公凡六世矣世以文行相後先故遂
為閩中族望云公生而風骨峻岐文菴公嘗令就學甫
十歲即善舉子業復多博習古文辭為文疏宕爽朗經
師異之曰大王門者必此子也文菴公亦喜甚甫弱冠皆
學漁石唐公鳳泉王公咸以國士期之歲辛卯舉于鄉

越乙未舉進士選授翰林院庶吉士讀書中秘三閱年
乃授檢討自同館咸推讓公才後文菴以公貴蒙恩贈
徵仕郎翰林院檢討母劉氏封為太孺人云公傷文菴
公早世祿養不逮太孺人復以久客京邸思歸丁酉冬
克舟使副使道奉太孺人西歸而祭文菴公墓焚黃寫
哀太孺人有女許字東生夔故仕族家稍削公特厚
其資嫁之仍歲時饋遺不絕以順適母意又明年己亥
公留內子東孺人侍太孺人家居單車復命再閱時會
東孺人卒公感泣且念母獨居云侍故肺疾寢劇具疏

以請得賜歸侍養越辛丑復奉太孺人如東師甲辰會
試為同考官取士號多得人乙巳冬太孺人念女積忽
不樂時公與纂修會典重違母意復疏請得奉太孺
人歸以丁未春還史館絳舊業逮己酉以九載考績乃
晉秩為修撰方公以盛年登朝而積勞取貴可歲月計
然公欲娛太孺人每遲回家居公誠賢者知所重固不
以彼易此也庚戌會試復為同考官公發策詢士略曰
今大同邊垣既以底績而薊州一路頗有遺謀自今作
之西接宣府東抵山海為邊千二百里使幹濟之臣戮

力經營患可少止是年秋敵果自薊州入天子採群臣議特
設提督大臣入使專備遼薊其議蓋自公發之冬十月會試
武舉公為主考官仰天祝曰是安得殉國之人而收之以裨國
用臨奏品士必先謀識所進武弁亦多得人公燕居好觀古今
名臣經畧凡關隘阨塞備禦疏密之詳皆能歷歷指陳不
俟按圖其用世意氣立談可知也辛亥冬詔晉秩為右
春坊右諭德署南京翰林院事公念南京王業根本控江
海上游宜早戒不虞每縉紳過從輒訊兵馬錢穀之事人
或以為迂無何會倭奴寇下江都郡始服公先識時洛陽孫

公以工部尚書攝兵部事公馳就議事即日協同內外守
備振揚兵威固守要害寇知有備遂遁去公謀居多甲寅
夏有詔召還官坊時太孺人留閩中便道歸省且疏請終養
天子不可吏部移文促公還任惶懼就道既入見復申
前疏留中不報乙卯秋命主順天府鄉試士類析自多
幸入公殿中公凡四入試場每錄出土爭傳觀謂真班馬之
匹云時公方嚮用會太孺人適末疾公聞報驚仆失聲悲號
寢食俱廢復披瀝請終養久之乃晉秩為南京國子監
祭酒謝恩畢即日陞辭倍道西馳不數日過岳西為文度

禱請以身代母太孺人聞公至病亦少愈是年冬閩中
地大震山摧用溢城郭廬舍多傾毀民人壓死者過半
而公亦不免實嘉靖乙卯冬十二月十三日悲夫悲夫
傳稱天道無親惟典善人君公之念母好爵不縻非所
謂善人耶而卒罹此曩所稱天道信耶否耶豈天地閉
塞賢哲將隱公固不能獨違也公性孝友始為諸生時
喪文庵公哀毀骨立比既貴每在告事仲父負菴恭順
唯諾如事文菴公與從兄弟維祺維新維厚羣居怡怡
友恭藹然人不知為從兄弟也從姪吉兆少孤貧公異

其質給就學按而教之甚備今為郡學生念族蕃有貧不能喪葬者割地立塋俾以昭穆次第即塋其中歲飢則出粟以贍族有婚喪亦如之故族人多德公云公素剛直少不當意即時貴必面斥其過人或不堪然與人交不渝終始誠意懇至迥出俗輩里中孫通判其居官清苦夫婦歿垂三十年其子不能塋公為買地塋之其英人之周多類此故雖素不悅公者亦服公高義雅意經世然優游館閣積二十餘年訖不當任故不及以功業自見時托之著述今有稿三十餘卷達人君子取而

玩焉亦可以識其微意之存也公先配東氏兵部車駕司郎中東君魯之女生男二曰逢春長春俱不育繼配安陽丞郭君從禮之女生女二長許舉人東君槩子某歿于室次許今吏部稽勳司主事南君軒季子學嗣側室宋氏生男一曰京闈復聘東君槩女尋舊好也太孺人卜以某年月日塋公少華山麓祖塋之次于乎公為閔中偉人咸期以公輔然歷官僅四轉享年僅四十有九何去之忽也然公文章節概傳千百年猶當赫々在人則公雖死猶生矣淳本海濱鄙生甲辰之春荷公首

荐入史館後公每辱訓迪愧淺中弱植不克副今公已矣豈名山之頽哲人之萎教固相待如古所歎乎敢忘固陋取公遺事論次如右惟大人先生擇而賜之銘公雖不幸亦可瞑目矣夫

中憲大夫翰林院提督四夷館太常寺少卿李公

墓誌銘

殷士儋

嘉靖初文治恬熙羣良彙進于時任于中朝者有八才子稱中麓李公其一也公以隆慶二年二月望日卒于家嗣子幼弱里中云賴稍一詩訖之而一二有司復持

之急以故不克襄事者數年至是始議以壬申某月日塋公綠原村祖塋前期嗣子持狀來請銘余曰公吾邦之良也矧頗悉其行事銘惡可辭按狀公名開先字伯華中麓其別號也先本伯陽之裔居隴西者最著其後始自隴西徙長城嶺又自長城嶺徙綠原村于是遂為章丘人教傳有名子瞻者公曾大父也子瞻生聰皆邑諸生聰生淳正德庚午舉于鄉取于王而生公以公貴累贈奉直大夫吏部驗封員外郎王累封太宜人公以毛詩舉嘉靖戊子山東鄉試第二人明年成進士授戶

明史紀事本末卷之三十六
部雲南司主事久之調吏部考功歷舊勲監封員外郎
郎中已又改司文選尋權太常寺少卿提督四夷館居
無何罷歸蓋家居者二十年而卒公生而卓犖穎異七
歲善屬文讀書一見輒成誦而又即知嚴律吟咏之學
稍長補博學弟子員里中有役繇苦公之自言于令
面試大奇之為復其家于是齊魯章維之士咸嗜之推
轂孛生矣未幾贈公捐館舍公哀毀盡禮已又喪其祖
母某公持服如贈公鄉人稱之服除遂連舉進士嘗運
餉金詣寧夏當是時閔中有兩太史廢公海王公九思

家在武功鄠杜之間公業聞兩公名及使還過訪之此
兩公者居以才自雄睥睨一世乃見公獨懽然相得為
留數日始別復移書唐太宰荐之抵家以疾在告者踰
年始授戶部主事戶部為金穀劇曹而公所督太倉粟
時尚有中貴人監之公不競不絀委曲調停去撓法焉
復奉命出理徐州倉頡之以望調吏部為太宰汪公鉉
所器重故任吏部者率矜崖岸高自標致局門謝賓客
雖親故人不相接以示尊居公頗數典諸文游以詩文
相賡和暇則浮白對奕談笑竟日而去廢事卒之人莫

敢于以私而稱吏部能謝絕請謁亦卒去踰公者公既負才氣居銓衡要路素抗直不善事權貴人而諸僥倖見抑者又日媒孽之時柄臣銜公不附已遺邏卒廉公陰事久之去所得終不釋公至是蓋已遷太常矣會九廟灾公例上疏自陳竟中以他事令公歸時年才四十耳居六歲而配張宜人又卒六歲而太宜人卒公哀毀弥甚每哭輒拮棺號曰天乎乃不令母見聞先舉子耶蓋遲者越八年始塋焉公故嘗病脾間歲作不至劇丁卯秋乃大作踰年竟不起距生于弘治壬戌八月二

十八日凡六十有八歲配張氏即先公卒者繼王氏齊東人咸有懿行可稱述嗣子名春塢娶康氏太守迪吉女公少博學彊記有大志所與交皆當世知名士以意氣相許遇事籌畫剖析多出人意表往先皇帝幸承天學命少傅翟公巡九邊云翟公議自遼東始業已行矣公獨請問謂曰公國家重臣也主上所荷任京師密迩當路塞藩籬單弱駸馳迅可至今車駕在江漢公柰何復去京師令緩急不相及乎公往宜自宣大此嚴宴相副萬全之畫也翟公矍然悔失計拊手謝曰老諍不任

事微君幸教幾失之卒改行如公策公之慷慨知大計
皆類此也于乎以彼其才假令秉筦鑰之奇所建豈必
且掀揭可觀乃于方壯之年竟一蹶不復起雖致位卿
貳稍稱通顯矣然實未克厥施也昔人論馮唐李廣有
不逢時之歎乃先皇帝長取遠攬臣下一言稱旨即不
次待以卿相可謂有時而公卒擯棄不偶以死此又何
說也比先皇帝上賓公聞之躡踊幾絕意若去復有知
已者公之情見矣公自罷歸稍孟克拓舊學典荆川唐
公念庵羅公約為天台雁蕩之游值喪其內子不果行

既而歎曰會心處不必在遠吾值岩居而川觀耳乃闕
亭館招致四方賓客時時以其抑鬱不平之狀發之于
詩尤好為金元樂府不經思索頃刻千餘言酒酣與諸
賓客倚歌相和怡然樂也以是公之長篇短調美徧海
內而名亦隨之人或以靡曼謂公者公不頽嗚呼古賢
智之士抱琬琰而就煨塵者或傍山而吟或披髮而笑
或鹿裘帶索而歌要之其中皆有所負而未庸故緣此
以自洩而世以恒度測之遠矣若公者毋亦有所負而
欲洩也歟良可悲矣所著有閒居集十二卷襟集二十

一種行于世係之以銘曰綉江之濱章丘是營誕此哲
人維公以生譬彼韞玉為主為璜僉曰良哉天衢而亨
胡然中塌挂冠遺榮綉江清漪可以濯纓以觴以咏以
怡我情千里伏櫪向風則鳴天地一喙泰山為輕古亦
有言人貌榮名彼巧宦者四至九卿公豈不達通駿有
殺鬱、羊、美矣佳城閱彼去疆視此勒銘

黃先生墓誌銘 皇甫汈

夫神駿伏櫪而駕駘駘乘娥眉棄捐而勃屑進御瑜瑾
韞韞而執甌騰價龍劍散矣而銘刀發礪士亦有然者

天乎人耶求士若此望世乂安得乎吳人于是乎搯擊
為黃生矣按狀黃君諱魯曾字得之人稱為中南先生
云其先河南汝寧人也宋元兵興間高安公徙家袁州
生斌少習孫吳書學擊劍騎射察觀英雄屬烏值徐壽
揮破袁州以斌為萬戶尋自偽漢亡歸高皇帝從徇南
昌授昭信校尉調禦蘇州遂家于吳君六世祖也生信
信生景暉為武略將軍景暉生暉始棄武攻文以進士
起家任比部郎決獄三輔以為神明生異號葵菴公君
其仲子也生而穎慧過人葵菴善操其息立致萬金產

析子各千餘君典弟省曾即五岳山人也盡以購書讀
之父為譙讓對曰昔人謂黃金滿篋不如一經刻五車
乎與其饒於賞孰若饒于學乎比部公聞而質之弱冠
並充弟子員竊鄙時義博綜羣籍探古文辭好奇縱論
為文閎衍莫能加焉焉長則方面巨耳修髯炯目昂軀山
立偉然丈夫也丙子試南畿主司為李公廷相覽其卷
深加歎賞置易第一錄其論以獻不竄一字俾為後學
式云屢上春官不第同年崔公桐時為少宗伯諷曰子
日暮矣時不可失禮曹司務員缺姑屈効一官可乎君

笑而拒之出曰咄嗟崔生安知余之心哉方今專重進
士即才如董賈學擅班揚位躋卿貳勲垂竹帛問之非
由進士終報顏憾心矣是時抱志不屑謁選者余長公
仲海中監王生文祿耳嚴相聞之亦願見此三人三人不
肯行天下想聞其風焉癸菴晚年任使使務博有大度苟
不得盧千金捐于一擲去恨也以故家易凋落又廣置
妾媵多生庶子卒無長物君事母王太孺人竭盡孝養
讓其先人之廬以與諸弟而身自僦居委菴晏如也長
兄太學生孝曾早卒拏幼妹長為治裝嫁之錢生用商

示以時義獲舉于鄉今為肥鄉令是也性狷介選俗離
羣寡所交遊弟省曾外惟王守王寵耳奈兄弟以中表
尤密八子齊名吳趙為之詔曰黃家二龍王氏雙壁皇
甫四傑鳳毛鸞翼同學莫敢仰視矣色山徐鱗以藝交
始終稱莫逆焉後遇太學張獻翼即投分歎曰恨得子
之晚也魚以峻直不能容物邑令張舜元苛法于其僕
斃于杖下君為發喪命蒲伏引慝里兒以催科逞侮君
上書李節推士允畧曰一介不取僕之志也倚馬萬言
僕之才也李覽之為歛容卒當侮者罪居父喪郡守胡

公績宗唁其廬就幕次稽顙曰哀經不敢詣公庭以謝
守辭而贈之其梗概皆此類亦以見當時守令賢于今
遠矣己未之春年餘七十猶擔簦躡屨自潞河徒步入
京師其篤如此所著多憤世刺時之篇若令語士役謀
枕戈襍言序使服官政必多忠獻毅烈乃竟已矣間居
弗豫時過其姪姬水城南積舍茂林修竹觴咏移日姬
水者五岳子也嘗奉安石以遊承阿咸之賞者也是歲
業將北上趣治裝把臂謂曰人各有志余豈智不逮而
父耶蓋卷五岳由辛卯舉于鄉亦置詩第一壬辰走京師

觀樂而返後不更往世盡高之亡何君卒方其殯留猶
不忘一第悲哉是為嘉靖辛酉六月晦生當弘治丁未
三月朔享年七十有五云娶徐氏都御史徐公源
之孫繼蔣氏側室趙氏男三長道美郡學生先
卒次道貴次河水俱郡學生孫男三道貴生嘉瑞郡
學生嘉德河水生嘉穀尚幼道貴等卜隆慶某年月日
奉公柩厝于巖靈西麓之新阡踰十年所而後克塋傷
我貧也狀即姬水手勒粲然華矣然詳于論文而畧于
紀事余稍增益所聞至云文喜左氏莊騷太史得其曠

婉詩喜曹謝岑李黃孟得其健逸皆實錄也余復何贅
焉而妄人詆其不嫻于藝何哉白首牖下誦覽不輟鉛
槧日搽多所校朝若孔氏家語兩漢博聞漢唐晉四傳
唐詩二選仙家四書大吟小吟錄詩說諸集行于世及
隱居北遊閒居客中諸集散逸頗多蓋襄陽綴不逮意
茂陵稿輒屬人也河水挺濟美之才負紹述之志旁搜
博采題曰天中集徐君序而傳之所謂愛奇凌誕率任
天衷蘊藻沈思獨持氣骨要亦知己之言哉二派請銘
銘曰矯々黃君希世奇宝死矣匪羣竿瑟違好莫為之

先蟠木登廟伊誰之愆荆壁委擢原_居屢貧孔行卒老
夸死馮生均溼腐少氣吐虹霓塞于蒼昊卜宅灵岩別
開京兆薛之中郎昌彰有道在矣餘名采斯允詔

明吏部文選清吏司員外郎王君墓表 皇甫汸

吏部文選員外郎王君卒其門生陸尚宝師道狀其行
友人王參議庭為之銘足以闡懿生平垂休未葉矣諸
孤謂_余其君乙酉同舉于鄉己丑同升于朝交最篤而
知更深也請表其顯且大者即補誌_狀所未備云龍_君諱
穀祥字祿之惟辛酉君以降而上世嘗誦酉室者適符

其生因題其居而自稱酉室云系出太原晋末徙閩之
福清唐水部滌為世譜載其先大雅慎微皆起進士傳
至八世祖仲舉贈奉議郎始遷吳之長洲生蘋仕宋為
著作郎終中大夫生敏精於醫生觀能世其業即君之
父也子孫守其方書往往全活人吳中稱醫家者流必
首王氏云君生而器雅童烏之齡即能屬文樂安之歲
遂充縣學弟子員文恪王公一見竒之曰吾宗千里駒
殆此子矣時文待詔蔡孔目尚在諸生中引為忘年友
二王諸袁以才齊名既舉進士改翰林院庶吉士

先帝疑政府私樹私李詔志罷之乃授工部屯田
司主事少宰徐文敏公乙酉座主也荐調考功尋
署文選員外遇正郎缺期月不拜謂君明慎銓藻
咸當其人力足攝也時太宰為婺源汪公鉉專伺政府
賢不肖一切倒置選法幾壞君每與忤將中傷君？稍
覺乃以母老不便北土乞歸侍養而忘其有兄不得輒
引是例命下予告仍勅按院覈之遂出貶真定尉棄不
拜兄穀禎尚官嶺南郡幕先有傳其物故者安也嗟乎
為母承譴去忝人子矣時鄺子汴王子慎中任子瀚唐子順

之並以才居吏部不利為伍君行而諸子亦相繼謝去
鄒陽入朝見嫉之言固不驗邪後周恭肅公故吏部少
宰也再召入京謂汪曰公不足王子者奚故汪曰本部
左遷非止一人彼獨薄尉者非矯邪周笑曰公謬矣員
外初以母不便于北土真定去京師總數百里獨能安
邪既以母老乞歸今可捨之而身自之官邪是猶欲其
出而閉之門也江浙間寧無散郡可迎養者乎公領之
意終不釋而君亦矢心不復仕矣亡何太安人背養居
喪敦禮以父事兄以母奉寡姊友睦蓋天性也杜門却

掃委懷圖史絕志絲華既去塵網之嬰亦山水之好有
田在東郭外課農自給殷春閱耕迨冬納稼間一往與
田父老談笑移日不知為吏部郎也胡安人亦時在籃
之君曰昔介子與母偕隱龐公將婦以遊向恨失之綿
上今幸得之鹿門矣按諸司交相推薦疏累上未報
厥後太宰為甌寧李公默己丑房考也素重君諷御史
特疏舉君又移書所司為趣駕終不赴時倭夷搆亂兵
火戒嚴人皆以墳墓妻子為念奚暇計爵位哉安人痛
姑之亡鬱鬱喪明君素不畜妾媵躬視家事雖洒削胃

脯酒醬之瑣悉理周密或以此少之而君恬不恤也君
既不出而李公竟坐謫死世益賢君矣今上嗣位簡用
先帝舊臣君業已補尉大名至是超拜南京文選主事
地近而易即僉謂由此可立致崇顯而君稱疾堅不就
衆為惜之而陸君由南儀曾起僅遷尚寶君殆有見也
郡守永年蔡公甫下車首書清德表其里杜駕造其庐
坐牀第間相勞苦君口不能語咄咄書空稽首作謝狀
里中嗟歎謂賢哉蔡侯也隆慶改元丁卯春二月十二
日安人胡氏卒君震悼幾殞五內俱傷又力疾為治喪

事瘁遂劇非為石刀圭可緩息也越明年戊辰九月九日卒七十稀年未躋二稔耳悲哉先是文待詔方負重名吳人士多因之起譽君尤所親愛其所否者余安定典黃江夏耳君為詩冲澹而不尚綺靡文亦典雅有則書做晋人不墜右軍大令之風奇興丹青追工摩詰之技篆籀八体並臻妙品晚抱書癖手自鈔錄云間寒暑讐言校魯承累云脫誤雖大亮之百卷繕寫子孺之三篋刊亡曷過焉今張燕公陸放翁曾南豐三集南唐書野客叢書手澤猶存所纂郡學誌并君詩文若干卷行于

世君性整潔不為奇簡室中器物置必有恆所衣服巾履雖敝去黜膩可澣足跡未嘗入公府有以事干請者挹其風概不復敢言客有詼人短者以他語亂之慙色而去自宋唐以降數百年遺象封誥壘書之類必加寶護此外云長物也子男三長仲友國子生次仲恭郡學生季仲序孫男四婚取皆名族詳具誌中茲不載君亦可以不死矣是歲十二月二十八日卜吉祖塋旁仲友等奉二棺合塋云司勳氏曰若王員外者表署于鄭鄉稽評于月旦勒有道之碑展季子之墓易名斷謚其在

陶趙簡乎夫晉君者年完君者天夷清而聖威節而賢
嗚呼先生之清節足以起懦激廉矣靈岩之境橫山之
巔爰起新阡灼々桃鵝夫人從焉奮猷樹烈後其考旃

明中奉大夫廣西右布政使許公墓誌銘 侯一元

嘉靖乙丑茗山先生許公以廣西右使覲還道家屬疾
其秋七月遂卒嗚呼鉅人歿矣我明述作于是焉寄并
列鼎膏亦既云食忽而幕焉弗及玉鉉命也夫搜獵典
墳淳濁自出而弗獲典司綸綍著之鼎石明鍊政理惠
亨人也而弗獲身都將相繫奠社稷馮翼孝德棊恭允

塞而弗獲正容造膝培輔袞哉公雖該三不朽嚴施云
窮典天壤終哉而知公者猶以密雲不施吾道窮也悲
夫始余甫與計偕公為都官從塵坐中獨騎訪余城南
郊舍引與為友余素慕公高其龍門迎謁則大驚不識
所自聞也已乃知公友蔡公子本言余而公忘已好士
所飢渴類如此徧于海內矣去五歲則公之弟叔夏來
同官一見相說其游昆弟不如也而余弟一麟亦自從
其所走贊謁公又弟蓄之因相為通家中間蹤跡或
離或合往十二歲則叔夏歿哭之及是而遂哭公焉悲

可言哉公卒之明年其孤長像將以十二月寔公某山之陽而謀父友敬亭陳公以狀來請銘嗟乎余何足以知公亦幸有陳公之言爾誌曰公諱應元字子春其先順天東安人高祖誠舉鄉進士謫宦為蘭溪典史道錢塘家焉遂為錢塘人誠生九臯九臯生紳、生龜年號平崖則公之父也力學負畸行為博士弟子試輒不第因棄去而有二子長為公次即叔夏應亭異材駢出於是公貴贈父奉訓大夫工部都水員外而母陳封太宜人蓋許氏之遷僅五世而隱然錢塘名家云公生而

絕敏數歲即日誦數百言平崖公受易稱深博而公年十五則盡通其家學嗣為博士弟子二十而舉嘉靖乙酉鄉試嗜古學名大起己丑之試太史倫公以訓奇其文欲高列之不能得至壬辰而舉進士復得倫公品之曰西京之文也當選庶吉士執政者欲一見公不往曰吾始仕也而當偃倭鼎貴之門冒詢干進哉竟坐是出為泰安州知州至則闢泰山書院簡士濯磨教之文風大振有豪石融法賂權貴人以請公不為撓廉白自守減節民力嘗有史僉事者以供饋薄粹察吏欲營之公

從容進曰知州罪也請貸察吏僉事不顧公出即投劾
自免於是按按交慰留公而僉事亦內愧去云何以能
理劇復調泰州泰人有張御史者陰鴛常狙伺持吏短
長橫州中公至與直繩既旬去所得即嚙伏不敢亂法
居一年以父憂歸服竟擢工部都水司員外郎是時江西
夏相國者幸于上詔工部遣官作治其父墓而夏欲得
名士即推公往非其志也然賊事不得辭使往且二年
益持廉正非公事不交相君相君心敬之欲轉公太僕
少卿公聞堅辭又欲使江西提學又辭其轉為虞衡郎

中也董鑄錢治盜甲日與中貴人從事而公端凝自持
未嘗與交私語中貴人亦莫不敬公者為郎六載乃遷
夔州府知府夔孔道交夷漢襍兵民號難治公馴以靖
廉取以平典時斥其桀黠者法之郡以蘇息日勸學敦
士暇則求三閭大夫杜工部故蹟為祠祀之弔古嘯咏
篇什流傳以孺飭吏彬々如也而夔之治遂為一道最
又六載擢四川按察副使甫上而值新執政不悅于故
相則以公前使事嗾言者彈公御史大夫屠公僑者剛
正人也抗言曰夫許子為郎久之乃出為遠郡又久之

乃遷即不考其行能也且若此者而猶為干進邪于是素履愈白然猶調為廣西副使兼撫夷之侵蝕郡縣為上三議曰責田主嚴罰格更旂軍大畧主守隘護田者扼夷奪之食殲牙牯童使自屈而已事皆施用攝兵府江誅巨獍三烏巨獍者莫氏兄弟三人以雄勇名兩粵間往嘗破城殺吏討之漏刃去前兵備以獲報而罷兵及是復出公懲前事設方略購土人決辰而三兇授首督撫將上其功公念前兵備且得罪乃力阻不復上有獄當遠戍而人眾公第請其一二餘悉未減曰法如是

足矣且戎者皆當發閭左護其後本以懲奸也而甚病民不可孔公之弘厚類是也遷遼東苑馬寺卿條救政八事轉雲南布政司參政未上而奔太宜人喪已未迺起補福建時倭夷整居緜掠公至則慷慨蓐食厲兵以寡擊眾遂大破賊多首功而公終守正不自言也公去閩半歲間則後守者隳敗賊遂入興化塗地矣壬戌為雲南按察使明年徙今官所在有績廣西父老迎公蓋欣之喜而泣也然公再歷瘴鄉憂民惕夷貌亦侵尋為之報矣余嘗以戒公甲子同覲京師數相問云志明

年余先至江右除道遲公恠其久不至豈謂長遽哉公之生正德丙寅正月廿八日得年僅六十甲子遭週也悲夫蓋許氏世仁平厓尤好施公嘗先意承志父歿事仲父如父事姑如母婚嫁其父昆弟又旁及其母氏之舅若女弟鍾公鄭媪凡窶貧者皆以公為歸其教弟石屋君叔夏也甚愛而嚴石屋君天穎舉世去與讓余嘗典品文至公則動容变色歛然自以不才弟也蓋伯氏而若嚴君云石屋君失偶遺其女公則使室人拏之已又厚嫁之粲而弗殊者也雅念水木每道東安省封樹

過存其宗人又携其子弟至錢塘教之成業乃去其交友不處若翁長卿相邵良用梗色子木梧子同桐張伯生乾元陸良弼佑或出或處而皆同心斷金焉伯生先卒事具公所為誌良弼貧也公則自滇萬里寄白金二錠資之其他醇德甚備而推本皆自平厓公所著有水部稿倚堂稿春秋內傳列國語史記鈔漢語合若干卷世嘗言文士抄行而樵魯者亦少文乃讀公所著書雄深雅贍遷固云以加也卓識通猷則肩于董賈其叙義烈苦言至意讀之常使人涕焉以彼質行而文迺若此

非所謂翔中處外者邪敬亭公稱公曰文行具美亶然
 式亶然或曰許公行仁厚天所佑恂恂不以其能先
 人、所助而仕頌久不進亦不大壽何也蓋公文詞絕
 世而不肯為貴勢役自前後相國麟萃天下之士雅誦
 洋、而求之卒^{公文}止有也亦知公矣彼豈能去心愠於至
 言天之故則其所甚美而新秘者尤莫如文詞故李杜
 輒軻勃賀則殫齒角翼足之理然也馴斯以規公位岳
 伯而年下壽其亦天之善貨也已悲夫公一娶徐氏贈
 宜人子曰長豫郎學生才行肖公者也再娶邑氏封宜

人子曰次紆三娶張氏子曰少存其媵子曰季序孫男
 蜀客郎學生楚材晉侯孫女長字林鳳翔次何汝孝俱
 邑學生次幼曾孫女一振、手仁者之後蓋未艾也銘
 曰被爾雲裳佩爾玉璜玄纁柔剛以行四方有耒惶、
 朱虎以降青牛逝矣紫雲其藏有芥有堂為歲為光言
 旋言歸於帝之傍

中憲大夫重慶府知府嵩陽劉公暨配胡孺人墓

誌銘 張佳胤

其弱冠稱諸生時劉先生守重慶校一郡士拔置高第

至引與二子黃裳黃鼎游蓋驩然師弟子也先生歿五
年而黃裳手狀徵余銘嗟夫狀所列盡矣而余安忍銘
然余視先生猶父也又何能辭按狀先生諱繪字汝素
一字少質其先陶唐氏有劉累擾龍于夏代著融顯因
初隸籍錦衣衛其徙汝光州自七世祖始曾祖忠贈太
僕丞祖進太僕丞以子方伯公貴贈少卿以孝旌閭生
六子季曰廷佩為先生父做儻喜大節好施予娶鐘夫人
生先生先生八歲師受伯兄經毛詩通大義稍長讀史
記汲鄭傳慕其為人為文做史氏伯兄見而驚曰必弟

也興劉者氏年十六補弟子員郡倅張君奇先生才為具
禮室胡孺人先生長哲電目高準修髯喜讀左國縱橫家
言擊劍通俠以自豪嘉靖辛卯領省解入京而滄陽王生引
少年數十輩逆先生邸郵校獵山下置酒亢歌振木燕趙慷慨之
士聞之咸為感奮比至京都御史儀封王公諸人曰今歲計偕士
若蘇清左國璣與劉生可謂中原三豪矣乙未成進士肄政
戶部常晏至大司徒梁公掾紫謙之先生為賦旅鶴上書求
去梁公更相推重而是時濟南李開先武進唐順之平涼趙時
春名傾一時乃云不下先生以母鐘氏夫人病告歸二年出授

行人使韓事竣道出武功時康修撰海家居逢先生縣
所歎曰子非汝南劉翬耶執手驩甚為置酒鞠域中康
自起撥琵琶先生搥鼓三摻作漁陽鼓宮羽轉激四座
盡傾明年選給事戶科首上治河疏陳四事上可其奏
九廟穴上封事具機祥洪範五行休咎勸上居法宮云
勞神是時貴溪相用事深忌先生益氣奮再伏闕上書
為樞言者一正言者二愚言者三在攬權取大臣令中
宮母得制兵而益開言路上為動容會口數入雲中詔
舉邊材可當口者而言官某阿相公私所舉不稱旨先

生廷劾言官非是上乃讓二相謫言官罷不稱旨者初
貴溪相與侯勛陰害而陽淳好謀共傾司馬王公遂
劾勛姦賊竟下獄而夏綠是欲中王并罪之先生為上
書理其寃明日罷王歸夏志甚然去可誰何先生者乃
遣客李寶以姑布之術說生先附已當夫顯先生怒髮
豎捽胡投寶柱下明日揖夏於朝曰某且死賊不能殺
客言他日從諸給舍壽相公相公手玉碗行酒至先生
前誦麗詞為歡公色勃故墮碗客盡驚出明日疏夏
十罪謂夏顯權驕恣去人臣禮嘗坐死疏寢不報是歲

壬寅六月朔晝晦上大恐問天官主何占公復上封事
曰臣謹按漢書劉向京房郎顛皆謂陰掩陽為臣迫君
之象沴氣下盛上著于天宜亟去言以塞天意明日遂
逐夏一時臺省出夏門者悉被黜因上邊事疏舉聶豹
王儀可大用而劾二桎臣選要語侵銓部吉水毛公伯
溫讀疏吐舌曰真夫哉每過先生必論兵陳車法先生
曰此故器書不可以兵夫口血飲而瑕張烏舉而獸伏
飄若風雨非得神勇士親鞏銜杖絕塞斫營則燕然未
易勒也毛公數服是冬復草疏欲及內事母鍾為絕漿

相向泣先生乃已因求使楚中奉母鍾歸明年癸卯改右給
事刑科未幾出守重慶蓋銓部報往疏也重慶在萬中山
稱岩郡先生携二子扁舟過黃陵廟祝曰此神禹駕黃龍
犂峽所也梁豫去數千里吾以二子來而以遇異返有如此江至
即貌野老幅巾延問便苦獻歲行春必載牛酒勞農因止宿
田家召其子弟教歌咏彈琴焉夜市火先生拜之減夏旱身雪
于社雨隨注至注先生之腹父老泣扶乃起是年大豐渝俗士
人上巳咸汎江游塗山先生亦間往諸父老具壺簞迎先生
少飲輒醉、歌起萬人和融、洩、至今想先景不衰渝

多奇士先生聚若干人使讀書塗山上丙午蜀試士半出其
中民有兄弟誦田者先生為對泣曰豈吾不忍其兄而使
民乃忍其弟哉民皆叩頭叩流血相讓田去凡受爰書
必平之法寧失無苛郡以大治郡地通西南夷而播永
土官數爭地相仇殺直在播臺使者屬先生按其事先
生單車入赤水永女酋魁結柞馬陣諸山譟兵澤中嘗
先生賄弗為動諭以大義永不勅兵播地遂歸渝江官
舸費萬計而大司空采木亦不下百萬計先生悉上奇
羨不以私屬守令皆莊事先生無敢晚視使者刻荐于朝為

循吏第一而值貴溪起相喉鄉人給事南省者論罷先生先
生讀疏笑曰誓予之彈絃而踏鞠殆知予者予乃今從
榮生帶索游矣然豈以重慶易吾養也乃度北瀕溼于
淤園之幾十里名玄湖：種魚十萬頭隄樹萬章盡有
蒹葭菱芡菰藕之利州上牧牛羊鳩彘聚廬其中如農
家又責僮以監笑乘馬數以歲賦布易鹽楨通馬者鬻
善馬他郡而實之邊因資以贏而身與數友馳快馬射
獵熊山下得禽以奉太夫人歡自撰歌曲為綵衣銀鐙
之舞以侑太夫人太夫人忘老為加餐其穀入屋：先

公之遺而親族貧士資以舉婚喪者半又稍通墨客云
它羸已太夫人歿而黃裳黃昇舉于鄉而盡散山郎諸
少年結草閣湖中集徒數十人誦經義授易勺四卷春
秋管十二卷作通論四十篇著詩賦序記雜文二十卷
學者尊為嵩陽先生而不敢氏安陽郭相嘗謂新鄭高
相曰劉汝素富于著作必傳矣先生之卒以隱仲子黃
昂而會試癸酉預知死日言白雞之年吾逝於逝二年
所而胡孺人亦卒孺人性甚慧年甫七歲誦春秋孝經
西泉公授以衛夫人書下筆精詣西泉公甚材孺人而

擇偶者云如先生遂歸劉姑鍾性嚴一鬻非孺人操鼎
即不食雖祈寒盛暑孺人未嘗少懈也先生給事省中
每疏上人：危孺人前慰姑曰給諫死忠新婦亦能死
孝姑何憂自省中出守至以謬罷孺人未嘗少感也其
力儉不侈自其天性然其柱二膝若姊如字其子女若
己出蓋所謂嫗賢儻行哉先生生弘治乙丑卒于萬歷
癸酉四月二十五日得壽六十有九孺人生正德丙寅
卒以萬歷乙亥十二月二日得壽七十子三黃裳娶崔
氏舉乙卯鄉試黃昂娶江氏再取成氏舉甲子鄉試黃

駿陵王出娶陳貞外璋女：一媵謝出適璋子九鼎孫
三衍衍衍聘鄉進士賈一敬女衍聘胡御史俊德女
女孫三適踰芳華聘賈之約羅璿張子曰嘉靖間夏相
貴勢熏灼天下幾俾人主矣先生以夕郎言事至今其
喘不出聲將虎鬚幾不免虎口岩哉乃其出守罷守始
終云少點流澤迄于今未闕其非純氣是用可知已顧
材雄不能受貧取譽於俗夫笑既已不用之國而用之
家即賜蠶何傷于賢乎至晚節益茂以經術其所取精
也多矣又記乙亥冬某起家南鄉迂道走先黃起居孺

人至則孺人先一月卒某為文哭已躍馬南山下作輓
展先生墓為之款歎失聲信宿長公子玄庐所然後去
嗚呼先生位不酬才與孺人教諸子伯仲道舉於鄉以
文章鳴世乃仲公賈志蚤卒何哉先生之由餘以完厥
施者實在于玄以及諸子矣某往與汝寧趙良弼太宰
私論先生父子氣節文章類眉山而孺人則又類陳太
君良弼謂其知言也為之銘曰造化福取不足曰惟先
生之畜搢婦則立壺極曰惟孺人之德嗚呼天中之野
惟康之江玄室千秋二靈安是施其本支振：濟美其

誰者銘已蜀弟子

中憲大夫江西建昌府知府少岷曾公墓誌銘

張

佳胤

武宗朝吾蜀數君子者起咸尚文章氣節而江陽少岷曾公其一也余為童子時聽學士長老誦記公名德如隔世人嘉靖丁巳走江陽為先府君乞墓銘于楊用修先生始奉公几杖公亦接引後進談學術經濟洒洒有致公歿後二十八年而公之子某考功君持狀以誌銘請豈以余受公一日之知耶余客江陽時聞公父某以

公貴受封遂稱封公其人倜儻重義數急人之難嘗拾遺金于道必迂歸以伺亡金者授之能詩文看有乾峯稿乾峯在合江縣去郡可二百里而遙縣西有安樂山千岩萬壑競秀爭流中為洞為臺為峯為盤為嶺為泉為峽為城為室即山經奇紀所不能臚列封公則樂之遂卜居終老而少岷公舉矣公生奇穎殊凡兒稍長即以聖賢正學自任七歲待封公山陽茅屋見隙光曰此何故我其野馬文虹耶封公異而詰之兒能對乎明透屋山光似玉公應聲曰影浮書案氣如龍封公益奇之

十四歲補博士弟子每試輒高等郡侯為築別業于鳳儀山以居之公益肆力于古今之學尤精書法得帖意時威茂兵憲王某者聞公名欲召置西塾督學蘇某曰曾生非可激往也宜禮聘之公應聘往因登大岷青城諸山西眺滙氏東眺汶瀆胸中吞其八九而歎曰大岷之外可稱配林孰與吾家安樂日相從几席間也遂易安樂為少岷山因自號云正德丁卯舉省試第五人明年成進士授戶部江西司主事時逆瑾為政縉紳趨者如市公不惟其^無所投刺間有言觸之會瑾執不附已者

跪午門外而公幾不免尋權稅清源以廉明稱後轉員外郎中條上大司徒八事一日革皇莊裁冗費禁濫支減廐馬清盜法停鈔法明徵納禁使用黜門稅重漕政大司徒稱善而卒不能行其言丙子知府建昌公益修循良以臻良二十千石共理之效上劑益藩下悉民隱立社學建院群弟子而考德問業盱水之上洋洋如也郡有兩芙蓉山多淫祠妖術橫行公廉得其首付諸理毀淫祠以祀伍大夫李旸江岳武穆郡俗遂變其他發閩人王政胡添三詐偽正豪民梁教十九殺人罪暴妖

術連世勳父子屍伸雪良民羅增克抑然皆非公之大者惟是寧庶人謀不軌要脅諸司莫敢不為壽以求免公自持如常會省城變起公遣健卒間道走上變又自帥兵魚程詣軍門陳擒勦七策王文成采之合兵大攻又慮九江南康業已從逆不分道擊之則楚援兵為梗文成檄公取南康斬賊首謝天一等四百八十餘級又自王家渡同廣信守周朝佐斬獲賊三百三十餘級釋脇從者八十五人寧庶人遂擒當公勤王時其母鄧恭人永訣誓與賊不共天卒能成社稷功王文成亦叙公

勞烈而竟不錄先是寧庶人膏腴花園屋宇多為豪所侵中丞鄭某者檄公一言所徇盡返之盱郡有巨室欲斷甃麻姑山公裁以法又上叛逆疏內有省內姦邪顯附語錄此忌與怨交集成為蜚語中公不免矣然盱人

至今尸而祝之益信天理人心未泯如此公以庚辰垂橐歸移居江陽郡城購茅齋數楹藏書數萬卷日坐其中手一編以著述自快中丞劉公大謨御史金公深交荐可大用不起著有聖學會通河圖洛書解卷王正月考歷代史評論心學論樂律論數學論氣化皆發自契

悟去所勸襲其要歸於中正精實有宋儒所不能道者
者歲旱課耕必里靜觀雨暘之故雩禱之節又著名和
錄不泥不鑿深于天人之際修川東志精核有本為一
方良翰為文高峻絕達一本六經行乎意之所止而不
沾、蹈古人語所與交者如王伯安何仲默鄭繼之呂
仲木皆當世偉人也楊用修白首成滇欲歸蜀為首邱
計乃不歸新都而卜宅江陽以就公相其賡酬甚盛然
公意在經學思成一家言以詔來者其于題詠劄記則
隨意小赫就成章、畢亦隨散逸今存者皆諸子私錄

持百之一二耳故名拾存篇云公貌修峻而癯骨立健
爽即屋漏去情容平生自不識權量手不持金玉耳不
喜絲竹布褶蔬食常晏如也曾經池陽夜夢青衣童子
入身曰余九子神也九華則爾卿李白所易重錫余以
嘉名意良厚故不樂也子為余復故號公覺作青陽九
子歌公哀糶云華感浮山靈非偶然者與人真誠直易
去他腸具知人鑒料事多中然善惡界嚴嘗面斥入過
不少避而宗族賴以衣食婚葬者甚眾常祿外及先世
所遺者分授猶子士謀士文士傳輩家有塾課子弟不

效經生常語故江陽稱曾氏子弟優者為龍劣者亦不
失為虎矣一日病革將易箒啟手足謂諸子曰平生無
他恨第著述多未脫稿紹明余志是在爾曾言訖而瞑
公守建昌有祠居鄉為月旦所重其鄉之人與弟子私
謚公文節先生又祀于社公蒙詔而屈抑林下者幾四
十餘年以考功君令甄寧時上最考循良高第請復公
職取俞旨亦異數云公諱某字東石生成化庚子三月
三日卒于嘉靖成午十一月二十九日享年八十歲上
世有祖諱長一自江西徙河南再徙麻城入蜀家于江

陽為河西公是為蜀之始祖河西公有隱德不顯歷四
傳生思虎思虎生海寬是為公父以公貴封戶部主事
配員氏封安人公配鄧氏封安人加恭人繼配郭氏張
氏宋氏封大孺人毛氏生子六士弘舉嘉靖壬子鄉試
授涇川知縣士宗士林俱郡學生士登丁丑進士士彥
甲戌進士考功司主事士科舉丙子鄉試孫男某_二曾
孫某_一以某年月日塋于某山嗚呼此據狀而誌公者
如此余為諸生時余邑先達有都運童養之先生蓋鄉
之樸茂長者其父諱琦_任為瑞明通判正值寧庶人變

起通判公亦嘗督師擒賊以功陞四品秩都運公嘗語
余言江西討賊之役有幸而功者有功而不幸者幸而
功者唯言之若功而不幸者吾鄉曾公是也都運公侍
父任得于耳目者真且都運公平生寡言必有中余
聞而咨嗟久之夫公豈惟功不錄並其所固有者而奪
之何以功忠余謂公時曾述此言以質公公笑而不答
嗚呼可以知公矣又為之銘曰於乎公出而稱社稷臣
者為年僅一十有三幾不絕于二逆之賊公處而稱
鄉先生社稷臣者為年僅則三十有九五庶幾乎兼太上之三不朽

忌公在人公何所嗔篤公在天公亦超然六子而高第
者四未量者二天君有意以報公志人恨公以有涯公
獨遊于無涯即小子能銘功德而于公乎何加

明如海

卷四十六

三

國

